



毛蟹

日頭下，圳溝肚，脣項个石縫仔，伸出毛蟹个兩支大夾，大夾面項絨絨个毛，流水梳到一條一條，對清清个圳水面頂看下去，仰般條理清楚。阿明輕手輕腳打水尾，一步一步行兼該石頭縫，黏邊手一抓（sa'），厥姆佢正好，恁注死！手指嘎分毛蟹夾著，目珠窟一下碼灌入大水，痛到緊喊阿姆哀！

毋盼得放過毛蟹，阿明盡命拈愛同毛蟹拉出來，毛蟹乜拚命拈退入深深个空肚去，阿明个手毋知樣般嘎在空肚石縫卡著，無法度再過伸入去，乜無法度同毛蟹拉出來，出入就毋得。仰結煞？阿明用盡歸身个力，尿就險險洩出來，正同該支左手擲出來！該載正得，手伸得出來，毋過，手指嘎夾著一支毛蟹夾——毋著！係分毛蟹夾夾著，毋得啟正著，這滿該死哩！

夾到纏纏个毛蟹夾，害阿明痛到會夭壽，佢目汁含等，遽遽用正手兩指，硬硬同夾仔掙下來，手指面兩點分毛蟹夾著个痕仔，清清楚楚、積血積血！阿明心肝肚想：「捉毋著毛蟹，毛蟹夾乜毋好打爽！連蝦公共下摻佢帶轉去炒，同肉挖來食，再摻厥毛刮忒、串肥料線，拿來做夾仔搞，分人經驗一下分毛蟹夾著个痛……」。

阿明當記得，三十零年前還讀國小時節，分毛蟹夾著个這隻故事！三十年前，小南埔莊外个大河壩、外崗圳、中央圳、莊項个圳溝、脣頭个坑仔，阿明對水頭到水尾哪位就有行過，哪位就有搞過。佢輒常看著毛蟹、釣著毛蟹、食著毛蟹。阿明盡記得，有一擺落大雨、出汶水，佢在坑仔釣毛蟹，毛蟹一擺就兩隻、兩隻分佢釣起來，無一點鐘，就裝淦歸錫桶，佢歡歡喜喜攪轉屋家，分阿姆做料理。又有一擺做大水个臨暗頭，阿明看著歸群歸群个毛蟹，蹶上石礮，跔著山溝山壠行等上……。

三十年前，哪位就有、麼人就做得捉、麼人就食得著，該河壩、坑仔、圳溝肚个毛蟹，走到哪位去？三十年後，政府大量對中國進口，廢田坵、挖魚塘來畜个毛蟹，講啊著一隻就愛幾下百銀來買，麼人買得起、麼人食得起？阿明實在恁毋解。

作者：邱一帆

☆詞彙學習☆

【黏邊】ngiamˊ bienˊ：馬上。

【掙下來】duiˊ haˊ loiˊ：扯下來。

【厥姆佢】kiaˊ meˊ giˊ：表抱怨，咒罵的感嘆

【該載】goiˊ zai：幸好。

詞。厥姆，音 giaˊ meˊ音變為 kiaˊ meˊ。

【汶水】vunˊ suiˊ：混濁的溪水。

【恁注死】anˊ zu xiˊ：恰巧、剛好。

【石礮】sag bogˊ：石頭堆砌成的堤防。

【空肚】kungˊ duˊ：洞穴裡。

☆文法學習☆

【哪位就……】到處都……。「哪位（哪裡）」為表方位疑問副詞，後加「就（都）」，表示「哪裡都、到處都」之義。意思相同的用詞有「一哪仔、滿哪仔」等。

例1：佢人緣當好，哪位就有朋友。（他人緣好，到處都有朋友。）

例2：佢兩公婆當好旅行，哪位就去邊寮。（他夫妻倆很喜歡旅行，到處都去遊玩。）